



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL. Anr.193/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Hajriz Hoti kryesues, Violeta Husaj Rugova dhe Bujar Muzaqi anëtarë, duke vendosur lidhur me ankesën e subjektit politik Lëvizja Vetëvendosje (LVV), me seli në Prishtinë, të parashtruar kundër subjektit politik Lista Serbe, me seli në Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë Fushatës Zgjedhore për Zgjedhjet Lokale në Republikën e Kosovës, të mbajtura më datë 12 Tetor 2025, në seancën e panelit të mbajtur më 13.10.2025, merr këtë,

V E N D I M

I. Pranohet si e bazuar ankesa e subjektit politik Lëvizja Vetëvendosje (LVV), me seli në Prishtinë, ZL.Anr.193/2025, e datës 11.10.2025.

II. Subjektit politik Lista Serbe, me seli në Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore për Zgjedhjet Lokale të mbajtura më datë 12 Tetor 2025, i shqiptohet dënimi me gjobë në lartësi prej 1500.00 (njëmijë e pesëqind) euro.

III. Detyrohet Subjekti politik Lista Serbe, me seli në Mitrovicë të Veriut, që gjobën e shqiptuar si në pikën -II- të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

IV. Urdhërohet Subjekti politik Lista Serbe, me seli në Mitrovicë të Veriut, që nga momenti i marrjes së këtij vendimi ti largojë posterat e vendosur në objekte banesore kolektive në rrugën "Milan Shuflai", në Mitrovicën e Veriut, përndryshe mosbindja ndaj kësaj urdhërese paraqet shkelje tjetër të këtij ligji që mund të sanksionohet me dënime shtesë nga PZAP-i.

A r s y e t i m

Me datë 11.10.2025, PZAP-i, ka pranuar ankesën e identifikuar me numër ZL.Anr.193/2025, nga subjekti politik Lëvizja Vetëvendosje (LVV), me seli në Prishtinë, me të cilën pretendon se më datë 10.10.2025, rreth orës 21:00, aktivistët e Lëvizjes Vetëvendosje kanë vërejtur që në rrugën "Milan Shuflai", në Mitrovicën e Veriut, është evidentuar vendosja e posterëve zgjedhore të subjektit politik Lista Serbe në objekte banesore kolektive. Ky veprim sipas parashtruesit të ankesës është në kundërshtim me nenin 7 paragrafi 2.6 të Rregullores Zgjedhore Nr.07/2024 për Fushatën e Zgjedhjeve, e cila ndalon vendosjen e materialeve zgjedhore në ndërtesa apo objekte banimi përveçse me pëlqimin paraprak të banorëve dhe kur janë të kontraktuara. Parashtruesi i ankesës thekson se vendosja e materialeve zgjedhore, pa pëlqimin paraprak të banorëve dhe pa kontraktim të rregullt, përbën shkelje të drejtpërdrejtë të dispozitave të Ligjit për Zgjedhjet e

Përgjithshme dhe të Rregullores Zgjedhore Nr.07/2024 për fushatën zgjedhore, dhe se ky veprim cenon barazinë ndërmjet subjekteve politike në procesin zgjedhor, dhe krijon një praktikë të papranueshme të uzurpimit të hapësirave të përbashkëta banesore, duke i ekspozuar qytetarët ndaj propagandës së pavullnetshme në mjediset ku ata jetojnë dhe ku duhet të ndihen të mbrojtur nga presioni politik. Sipas parashtruesit të ankesës kjo praktike bie ndesh me parimin e barazisë së garës zgjedhore, të drejtën për zgjedhje të lira e të ndershme dhe me standardet e demokracisë, duke i vendosur disa subjekte në një pozitë më të privilegjuar përballë të tjerëve përmes shfrytëzimit të hapësirave të palejuara. I njëjti kërkon nga PZAP që të konstatojë shkeljen e përsëritur nga ana e Listës Serbe, marrë parasysh vendimin e PZAP-së ZL.Anr.75/2025, dhe të ndërmarrë masat e parapara ligjore, duke përfshirë urdhrin për largimin e menjëhershëm të materialeve të vendosura në mënyrë të kundërligjshme dhe shqiptimin e sanksioneve administrative të përcaktuara nga ligji dhe rregulloret zgjedhore, theksohet në ankesë. Si dëshmi ka bashkangjitur dy fotografi.

Subjekti politik Lista Serbe nuk ka ofruar përgjigje në ankesë, edhe pas kërkesës së PZAP-së.

Paneli Zgjedhor për Ankesa dhe Parashtrës-PZAP, pasi shqyrtimit të ankesës dhe provave të bashkangjitura, vëren se ankesa është e bazuar.

Paneli pas shikimit të shkresave të lëndës, vlerësoj se pretendimet e Subjektit Politik LVV, janë të qëndrueshme dhe të bazuara, dhe si të tilla i aprovoj, për faktin se veprimet e përshkruara në ankesë paraqesin shkelje nga ana e subjektit politik Lista Serbe, ngase e njëjta ka vendosur posterët në objekte banesore kolektive, përkatësisht në rrugën "Milan Shufllai", në Mitrovicën e Veriut, me të cilat iu bënë thirrje qytetarëve për votimin e subjektit politik, Lista Serbe me numër 170 për procesin zgjedhor për zgjedhjet lokale të mbajtura me datë 12 tetor 2025, ku me këto veprime ka shkelur dispozitat e nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, në të cilin nen përcaktohet se *"Veprimet e ndaluara të Subjekteve Politike...Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose në hapësirat private pa lejen e pronareve ose shfrytëzuesve."*

Paneli, me rastin e vendosjes së lartësisë së dënimit si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor të mbajtur, shkallën dhe peshën e shkeljes, shkeljet e rregullave zgjedhore që ka bërë subjekti në fjalë në këto zgjedhje, përkatësisht faktin se i njëjti subjekt në këtë fushatë zgjedhore është dënuar edhe më parë për shkelje të natyrës së tillë dhe me këto veprime i njëjti ka përsëritur shkeljet. Po ashtu, Subjekti Politik, Lista Serbe, ka qenë i njoftuar me obligimet dhe përgjegjësit gjatë procesit të fushatës zgjedhore, prandaj vendosja e posterëve-njoftimeve të subjektit të tyre politik për fushatë zgjedhore në objekte publike gjegjësisht në objekte banesore kolektive në Mitrovicën e Veriut, pa pëlqimin e organeve kompetente komunale, përbën shkelje të legjislacionit zgjedhor, dhe të njëjtat shkelje janë sanksionuar me nenin 34 par.1 nën par.1.2 të Ligjit NR.08/L-228, për Zgjedhjet e Përgjithshme në Republikën e Kosovës.

Prandaj, duke u mbështetur në nenin 117.3 të Ligjit NR.08/L-228, për Zgjedhjet e Përgjithshme në Republikën e Kosovës në të cilin nen përcakton se *"Vendosja për ankesat nga PZAP-ja mbështetet në dëshmi të qarta dhe bindëse."* Paneli vlerësoj se pretendimet e tilla të palës ankuese janë të qëndrueshme dhe të njëjtat i pranoi, sepse kjo shkelje ka të

bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokratike, paqes dhe respektit për sundimin e ligjit se nga veprimet e përshkruara në ankesë nga parashtruesi i ankesës paraqesin shkelje të dispozitave të lartcekura, dhe të njëjtën e pranoi si të bazuar.

Paneli vlerëson se në rastin konkret Lista Serbe, urdhërohet që nga momenti i marrjes së këtij vendimi të largojë posterat e vendosur në objekte banesore kolektive, përkatësisht në rrugën "Milan Shuflai", në Mitrovicën e Veriut, ndërsa dështimi për t'iu bindur kësaj urdhëresë të PZAP-it, brenda periudhës së përmendur në vendim, paraqet shkelje tjetër të këtij ligji që mund të sanksionohet me dënime shtesë nga PZAP-i.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1, dhe neni 120 paragrafi 1 nën paragrafi 1.3, dhe paragrafi 2, të Ligjit NR.08/L-228, për Zgjedhjet e Përgjithshme në Republikën e Kosovës, dhe nenet 9 paragrafi 5 nën paragrafi 5.5 dhe neni 13 paragrafi 2 të Rregullës Nr.01/2025 për Procedurat e Parashtrimit dhe Vendosjes së Ankesave, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA
ZL.Anr.193/2025, datë 13.10.2025

Kryesues i Panelit
Hajriz Hoxha



Këshillë Juridike: Kundër këtij vendimi nuk është e lejuar ankesa sipas nenit 118 paragrafi 4 të Ligjit Nr.08/L-228 Për zgjedhjet e përgjithshme në Republikën e Kosovës.